

“Tin biaha un shete ta miho cu un dies”

*Zyon Luidens
ta lansa
su album
'Perspectiva'*



ORANJESTAD - ‘Tin biaha un shete ta miho cu un dies, depende di cual vak e ta bin, esey ta perspectiva’. Esaki ta un di frasenan mas remarcabel den e album nobo di e hoben Arubiano Zyon Luidens.

Zyon, 20 aña, ta bira politico, romantico y critico cu su liricanan y ta discuti diferente temanan basa riba experiencianan propio.

Poco siman pasa, Facebook tabata yena cu sosten pa Zyon, bou di e hashtag di #Perspectiva. E hoben ta conta Bon Dia Aruba cu locual a inspira e pa skirbi y lansa su propio album ta un experiencia amargo cu el a pasa aden. Ta asina cu Zyon tabata forma parti di e banda cu a sali banda di aña. Como semper ‘e banda di aña’ (titulo duna durante carnaval), ta bay Arubadag na Hulanda pa toca.

Zyon tabata prepara su mes

caba. Pero otro miembronan di e banda a bisa cu e no ta eligibel pa bay Hulanda cu nan, como cu e ta ‘gordo’ y su imagen ta haci cu e no ta bendibel. “E cos di mas fefelo ta cu esaki no ta e prome biaha cu mi a wordo exclui di algo pasobra cu mi ta gordo. Desde chikito semper nan tabata tenta mi pa esun motibo.”

Manipula cu emocion

Den su canticanan e tambe ta adresa politico y den esaki e no ta sconde pa bisa cos pica: “Betico a bira promocion di un partido, ta con nos por progresa cu un politico cu no ta bibo, mi tin

respet pa tur locual el a logra pero no pa esunnan cu ta uza su nomber pa cobra.” Y e no ta stop eynan y sigui menciona ‘mesun mentalidad antiguo tin mi pueblo bobo y un sistema hudicial cu no ta sirbi tampoco’.

Pa riesgoso cu bisa cosnan asina den aire liber ta, como hoben Zyon ta sinti cu e no por keda keto riba cosnan cu actualmente ta pasando riba e isla. “Tin cierto gruponan politico cu ta bisa cosnan manera: si Betico lo tabata bibo, e lo no kier cos ta asina. Of: Betico lo tin berguensa di wak kico ta pasa cu nos isla. Asina nan ta logra manipula

hende uzando emocion. Ami no ta haya esey corecto.”

Combina 14 cantica, Perspectiva tin mas o menos un 100 mil toca riba Soundcloud. Tambe Zyon den su liricanan ta papia di su tempo na scol, e unico etapa di su bida cu e ta sinti cu e no siña, con meneer nan tabata descurasha su persona y bis’e cu musica no tabata a algo pe. E ta papia di capitalismo y con awendia hende tin miedo di sigui nan soño, pero no tin miedo di ta catibo pa placa pa henter nan bida.

Bon Dia Aruba ta puntra Zyon si e tin un propio cancion faborito. “Mi cantica prefera ta Stima bo mes. Desde chikito mi tabata tin issues cu sinti sigur di mi mes pasobra mi tabata gordo. Mi a custumbra asina na e echo cu hende ta bisa mi cu mi no por haci algo, te cu a yega na e punto di mi bida cu mi a pensa mi no por haci nada drechi. Mi sa hopi hende cyfo tambe ta sinti asina.”

E ta bisa den e cancion: ‘Mi tambe a pasa aden, mi tambe a yora yen anochi pa mi pega soño despues, mi tambe a pasa yen anochi cu mi dudanan den cabes y mi ta spera mi yuda abo pa bo nunca pasa den dje.’

Hoben, no tene miedo di critico

Finalmente Bon Dia Aruba kier sa di Zyon su plannan pa futuro cu su musica, na cual el a responde cu e tin hopi mas na caminda. “Mi tin hopi mas ta bin, pero pa awo mi ta asina orguyoso di Perspectiva y e apoyo cu tanto hende a brinda mi.” E kier haci uzo di e echo cu por papia hopi idioma pa e haci cancionnan varia. E ta spera tambe cu e por sirbi como inspiracion pa otro hobennan den sociedad cu ta wordo wanta abou pa otro y tin berguensa di sigui nan soñonan.

“Pa nan no tene miedo di ta critico, expresa nan opinion y uza nan talentonan pa beneficio di sociedad.” □

